



**Nandino ŠKRBIĆ** imenovan je za direktora JP RTV ZENICA u oktobru 2017. godine, na mandatni period od četiri godine. Od dolaska na funkciju direktora ovog javnog preduzeća, pokreće niz aktivnosti i inovativnih programa, u cilju obogaćivanja sadržaja na Radiju i Televiziji Zenica, kao i na web portalu (*zenicainfo.ba*). Idejni je tvorac i jedan od pokretača prvog ljetnog festivala „Zenica Summer Fest“, kao i prvog zimskog festivala „Zenica Adventure“, u okviru kojih su se, na više lokacija u Zenici, održavali vrhunski muzičko-scenski performansi i zahvaljujući kojima je Grad Zenica upisan u turističku mapu regiona jugoistočne Evrope. Kroz programske sadržaje ova dva festivala (ZSF i ZeAd) tokom 2018. godine „prošlo“ je preko 300.000 posjetilaca, a samo jedan koncert u okviru ZSF-a izazvao je ogromnu pažnju javnosti, kako građana Zenice, tako i posjetilaca iz drugih gradova regiona i oborio sve rekorde posjete u ovom dijelu Evrope, kada je na jednom mjestu (Kamberovića polje), na koncertu mega popularne grupe Dubioza kolektiv i svečanom zatvaranju prvog ljetnog festivala, bilo prisutno oko 100.000 posjetilaca.

Ratne, 1993. godine, nakon što je na inicijativu nekoliko zeničkih humanista 'pokrenuta' poslovnica Dječije ambasade u Zenici, aktivno se uključio u rad i imenovan za Dječijeg ambasadora. Dječija ambasada je 'imala zadatak' da djeci, kroz razne zabavne i kulturne aktivnosti, odvuče pažnju sa ratnih dejstava, u čemu su i uspijevali. 1994. godine pokrenuli su projekat – festival „Djeca pjevaju hitove“, koji je te godine i održan u Sali tadašnjeg kina Zenica, uz prisustvo preko 1.000 djece, omladine i roditelja. Kako su rasla ta djeca, učesnici prvog festivala, tako je rastao i sam festival. Iz godine u godinu, festival je postajao ozbiljniji, da bi 2002. godine, na prijedlog RSG radija i PINK televizije, koji su bili partneri u Projektu, pokrenuli još jedan festival – Regionalni radijski festival. Zajedno, ta dva festivala, uz učešće neafirmisanih mladih pjevača iz cijele Evrope, kao i mega zvijezda regiona, činili su BH festivalske dane u Zenici – REGIONALNI RADIJSKI I EURO POP FESTIVAL, koji su se održavali na otvorenom, u centru Zenice, krajem augusta mjeseca.

Od 2002. godine aktivno, kao izvršni direktor Projekta, radi na organizaciji Izboru najuspješnijih poslovnih ljudi i kompanija jugoistočne i srednje Evrope (Menadžer godine), koji se svake godine održava u julu mjesecu u Sarajevu.

Aktivni je član Kamernog simfonijskog orkestra Zenica, najznačajnije kulturno-muzičke institucije u Zeničko-dobojskom kantonu, kao instrumentalist na fagotu, od 1996. godine.

U septembru mjesecu 2015. godine, na poziv Ministarstva vanjskih poslova Narodne Republike Kine, učestvovao na 20-dnevnoj akademskoj razmjeni i studijskoj posjeti nekoliko kineskih pokrajina (Peking, Liaoning, Shandong), kao predstavnik Bosne i Hercegovine, uz predstavnike zemalja 16+1, pod nazivom „Mladi i srednjoročni lideri iz centralne i istočne Evrope“.

Trenutno je na postdiplomskom studiju Pravnog fakulteta Univerziteta u Sarajevu, na katedri pravno-ekonomskih nauka. Sretno oženjen, otac dječaka (7) i djevojčice (5).